


Belen Kock-Marchena cu presentacion masha bunita mes pa miembronan di Club di Buki di BNA

ORANJESTAD (AAN) – Señora Belen Kock-Marchena, Juffrouw di School cu a duna les na Pius X durante su trayectoria completo, y autor activo di poesia di cual tin tres buki publica, a tene un bunita presentacion di poesia durante e anochi di encuentro di Club di Buki, na Biblioteca Nacional diabierna anochi.

Na prome lugar sra. Kock-Marchena a perfila su mes. El a splica cu hopi hende ta kere cu el a nace na Aruba pero esey no ta asina. Ta na Bonaire el a nace pero su mayornan cu semper a procura pa nan yiunan haya un bon estudio, cual no tabata posible na Bonaire e tempo ey, sa dicidi pa bin Aruba unda si tabata tin bon school.

For di e tempo ey, na 1948 te aworaki Belen ta biba na Aruba, y aunke e ta stima Bonaire masha hopi mes, e Isla unda su lombrishi ta dera, e no por nenga su madrastra cu ta Aruba y na unda e cosnan mas bunita di su bida a sosode.

Na Aruba el a topa cu sr.



Dolfi Kock cu ken el a casa y cu a pone move di Playa pa Dakota. Nan tin awor 46 aña casa, y nan ta biba hopi feliz, a forma un famia grandi cu nan tres yiu tur baron, nan casa y nan nietonan.

Belen a conta cu el a lanta den un hogar dushi cu hopi amor cu e famia a ricibi di nan

mayornan. Un famia grandi cu ta consisti di seis yiu muher y cuater yiu homber. Nan tata a dicidi cu e ta manda nan studia mas bien na Curacao unda Belen a caba su Mulo, y su tata a papia cune riba e posibilidad di studia pa maestra di school aki na Aruba.

Belen su deseo tabata pa bira trahador social, pero pa haci esey lo mester a bay Hulanda locual su mama no tabata kier pa nan haci, y como yiunan obedece el a bin Aruba y a bira

maestra di school. Despues di a studia cuater aña akinan e mester tog a bay Hulanda pa haal su diploma y asina e caba a bin traha na Aruba.

Como juffrouw di school el a sinti su mes hopi biaha mescos cu un trahador social pasobra ta maestra ta un vocacion y hopi biaha e muchanan ta bin cu nan baggage for di cas. Semper el a bisa su alumnonan cu na prome lugar e ta nan mama, na di dos su amiga, y na di tres nan maestra y asina el a educa su muchanan na

Dakota.

Sra. Belen Kock-Marchena tin gran amistad cu sra. Digna Lacle, ken tin un trayectoria largo den e tereno di Literatura, y di ken Belen a uza hopi material den su clas.

LITERATURA:

Tocante su entrada den e mundo di Literatura, el a conta cu el a wordo encurasha pa damanan manera sra. Alice van Romondt, sra. Digna Lacle, sra. Filomena Wong cu a pushe pa e purba di publica su poesianan.

Locual a dune su smak pa publica su obranan ta cu sra. Alice Van Romondt a mande na un festival na Amsterdam. E ta corda cu e no tabata tin buki e momento ey pero el a bay cu su manuscrito cu a wordo traduci na Hulandes pa sra. Ria Petrona. Ora Belen a bay Hulanda, loke tabata un honor masha grandi pe, el a declama na Papiamento y na Hulandes. Den pause el a wordo acerca pa personanan cu kier a cumpra su buki y e mester a bisa cu e no tin publicacion y el a wordo sugeri cu a bira tempo pa e publica. E ora ey esaki a sosode y actualmente e tin tres buki publica. Den otro articulo DIARIO lo elabora mas riba e parti aki.